

天真閣集

天真閣集卷十一

詩十一

昭文 孫尿湘 子瀟

疆圉大荒落

打春謠

和風一吹萬物喜春人笑出珠簾裏
縣官行春過門前土牛顏色占豐年
牛腹白夏雨秧田水三尺牛背黃
秋風稻穀堆滿場人人打春爲春舞
六街春毬亂如雨紅樓中人亦打春
綵絲五色拋牛身打著頭百事遂打著
尾百病退願春長駐花開輪願人顏色
長如春安得遊絲縛住曙烏足人與花
俱受春福

客陽羨阮師署喜椒卿至

暫學郝生入幕賓喜逢張籍共昏晨
交情最是同門契客况偏於對榻親
天下文章宜少作江南佳麗在初春
牧之水榭東坡

豎此願今人笑古人

花朝宜興署中

夢裏鶯啼散曉霞煖風著意透牕紗一簫綠漲穿城水十里紅
迷繞郭花院靜有人還弄笛春濃無日不思家寄聲東瀉溪頭
柳早晚先生欲放查

一枝筠管一枝簫清福偏從客裏消破曉靜聽花坼蕊娛春如
見女垂髫蝶捎西角鈴微動人背東風柳自搖卻憶去年今日
事綠窗看翦豔紅綃

登樓眺銅官山色時城中玉蘭遍開

樓上簫聲樓下聞一城春氣蕩氤氲花光透屋多如雪山影連
天欲化雲西沈漁歌空遠水東風燕子又斜曛買田爭似浮家
好罨畫溪流一角分

客陽羨兩月遇校試不得出每飲輒醉戲示椒卿

春風習習絳帷紗同駐雲亭問字車青眼山看青眼客素心人
對素心花遇銜杯似兒逃學盼撒簾如吏放衙閒殺畫眉京兆
筆一爐香篆夢還家

時椒卿新娶

將返琴川畱題陽羨署壁

鵝州小佳又經旬繞郭烟波二月春我欲明朝挂帆去銅官山
色解畱人

繞隄楊柳萬絲垂臨去東風一笛吹空載滿船詩思返不曾攜
得國山碑

更有張公小洞天隔湖空翠望如烟山靈應笑先生嬾只借官
齋兩月眠

春日飲總宜山房醉後放歌

桃花杏花紅入城詩人逐花出郭行山家玉缸春酒熟酒香飛
出牆頭迎入門二客先已醒也先至後來一飲三百觥玉蘭肥
甘菊葉脆山翁勸客杯盡傾醉中絕纓忽大笑千巖萬壑皆春
聲是時春山雲弄明白雲壓山山力爭一峯忽飛入雲去透出
雲頂蓮花莖餘雲繚繞衆山腳欲涌山勢爭秋晴酒人觀之拂
拂作酒氣胸中自有百萬春雲生何當一口噴作雨霑灑四野
催春耕翁家多收百斛杭釀爲梨花春雨糟牀鳴供我日日醉
倒不歸去寫盡山中烟雲變滅畫意兼詩情

贈方大子和

變

昨夜聞長笛梅花落復開東風吹不盡飛雪滿高臺明月懸歌
扇滄溟瀉酒杯蘭亭王逸少正是莫春來

方工書

春夜夢所思

夢入梅花裏清芬疑是君風前一橫笛飛雪已紛紛大地皆明
月中天只片雲相思與春水浩蕩白鷗羣

上巳日苦雨時子侃方病凌客子山輦俱赴鹿城無可
詣者愁臥而已

愁寂西窗暮雨天故人都在玉山巔一城花事空如錦三月寒
威尙折縣頻典春衣償酒券閒臨禊帖費詩箋憐余不是雅摩
病也學垂楊起復眠

題畫蘭

幻色豈由夢真香疑是渠相逢洞庭浦曾襲水仙裾衆草根難
近羣花影不如儵然出塵筆苗裔本三閭

送張子和農部奉太夫人之京任

問君行何爲親年八旬一君曰是親志命以身許國祿養古

所重臣力兼子力慈躬尙輕健遄往須盡室季春風融和水驛
緩不疾有婦能調甘有孫善承色五月達京師六月供官職鼎
鍾獲所資盡瘁還自恤從來忠孝理偏摯難兩得時清誠可爲
精白敢韜匿盤錯苟相待絕裾非失德須知曾閔徒易地皆禹
稷如徒尙祿養何以辨家食君爲司曹官致澤果何術上無懈
夙夜下且娛永日行矣無他言長途慎寧謐

儒官妾

有貴官見法愛妾改適廣文者爲作此篇

尙湖夾岸桃花路三月水嬉舟競渡傾城士女出城遊人影衣
香不知數中有纖長最麗姝湘波裁翦作輕裾星眸流轉通辭
語雲髻玲瓏入畫圖不是雪兒誇協律定應雷氏號尙書鄰舟
老媼依稀識爲說桃花舊蹤迹吾邑金張孰最豪彭城兩代爲

方伯方伯鬢鬢白面郎繡衣早震古閩疆錢傾東壁銅千尺絹
繫南山樹萬章白晝鳳窠雲作隊清宵妃帳玉成行爲紆行李
朝京邑更訪名花到故鄉城南有女桃花靨門外羣媒多似蝶
不惜千金買柳枝便持雙槩迎桃葉夫婿金多爵更尊當筵愁
伺笑兼嗔性嚴可殺彈箏伎令肅常筭勸酒人香屑踏來防有
蹟銷衾抱得偶承恩可憐空負如花貌曾侍花前幾度春春花
秋月匆匆改歡樂未終哀已待旌節纔聞移粵西檻車已報收
南海平時心計枉自工到此頭顱不能買少子荒區萬里行全
家破屋三楹在此時飄泊向誰邊此際神娥盡化烟蠶繭苦抽
孀婦縷鸞膠甘續別家絃聽說儒官頗風雅青瑣冷坐槐陰下
拾橡剛逢鄭老閒當壚來看文君寡相逢恨晚許相從金屋何
妨借泮宮合卺新陳盤苜蓿圍橋低隱水芙蓉縱教身染儒酸

氣已勝名填籍沒中季倫果是風流子綠珠甘向樓頭死細骨
難邀百琲珠纖腰枉減三餐米猶憶倉黃被禁收自憐衫襖蒙
塵滓但看賓從散如雲那怪人情薄於紙卽今講席雀堪羅同
首油幢富貴多卻喜先生知愛玩不愁夫壻更風波絳紗帳裏
春常在青草墳邊客少過聞道夫人茅屋冷一盂麥飯淚滂沱
我聞老嫗低徊述說到傷心長太息哀樂何須豫己身盛衰自
古關人德回望斜陽掩靄中濛濛烟霧桃花溼

二蘭篇

有貴介子以十萬錢購素心蘭一本肩諸高閣悶不與
人見蘭雖得所而有繫拘之慨

幽蘭如美人素心尤足貴叢生空谷中不爲衆情媚誰攜入城
市得遠蕭與艾輾轉入朱門供之玉堂內堂猶恐不密局置幽

閣邃危架以爲防重幕以爲衛春風豈不香不漏一室外主人
顏雖好恐非此花配亦有素心人而花不相對旣失瀟灑理漸
覺色顚顚由來過高潔其性難自遂深藏縱所甘隱蔽心已累
何如湘江草采作騷人佩朝隨隴上吟夕伴燈前醉貴重不及
茲得所豈求備萬物各有遭蒼蒼肯易位

別有素心蘭一本爲賣藥家所得花時任人縱觀而豚
圈鷄栖雜以麴蘖之氣殊不可耐

造物旣汝妬盍令性不芳予之素心質託根宜瀟湘被以柔和
風濯以甘露漿幽人與爲伴昕夕相徜徉胡落市人手錯列鷄
豚旁壅培匪不厚徒受汙泥障灌漑匪不勤詎有清泉涼位置
何所以瓦盆及糟牀陽春二三月開缸見浮梁酒徒來醺醺醉
氣蒸滿堂蘭亦挺深秀漪漪揚其香我時雜其閒瞻睇心爲傷

翳彼蠕蠢姿對茲窈窕妝馨穢本殊性習久還相忘始知物至美遇合多鮮臧不見宿癰女赫赫當侯王

西郭邨舍觀牡丹先一日已翦盡

東風斜繫總宜船欸到柴扉色黯然欲洗雙眸看富貴豈知一夕化神仙紅薺自占春無數綠葉偏逢客有緣卻笑紛紛蜂與蝶疎籬閒就短枝眠

膺昭文武陵公之聘移榻官舍西爲聽事堂日聞箠管東爲尉廨頗事笙管之樂喧聒之餘不自知心之怵怵動也

萬象皆冥漠惟聲動人心萬聲若暗啞動人惟刑淫鄭聲必放斥蕩佚孔所禁君子遠庖廚子輿垂其箴今我置耳處二聲交相侵東院召絲竹清歌發花陰西廳列伍伯呼號儼棘林歌者

知是誰未必先施音聽之神怡怡如以冠挂簪號者知是誰未必皆冤禽聽之心惻惻如荆棘與鍼樂者我逸志哀者我本忱哀樂并一念仁與私欲參徘徊向歧路亡羊豈能尋臨河不自返一墮重淵深古獄不妄聽先入須鈞金古樂不妄陳不徹惟瑤琴載告良有司反覆觀此吟

三月晦日

晚風搖曳片雲停半似晴光半晦冥一院頓收香世界四天新換綠圍屏蠶緣絲盡生無味蝶爲身閒夢不醒未了傷春還小病垂簾細把落花聽

送春

黯黯輕烟漠漠絲無言手自把清卮不知送別宜何處恰是懷人值此時江水欲流春夢去天涯又見夕陽遲青梅如豆花如

雪獨立蒼茫自詠詩

聞道

聞道維摩室親逢天女遊山花迎面笑澗水帶香流玉殿生秋月銅壺失曉籌神仙行樂閱雲鎖洞門幽

神妃

春水響空山神妃浴雨還飛花隨繡帶隔竹露烟鬟客散青松冷風清白宦閒惟餘雲一片偷送下人寰

醉歌行

醪醖撲雪糟牀鳴春風澹蕩吹人輕隔溪青山宛然笑此日不飲空復情酒旗搖搖若相迎兒童指點老眼明玉壺滴滴紅珠傾宛轉勸客枝頭鶯落花平地一尺厚醉來逕臥忘其形我聞天上有酒星三百六十日醉倒雲冥冥天宮大索不可得卻來

人世呼醪安得糟邱爲五嶽春酒爲洞庭供我常醉春常青
醉鄉絕無寵辱驚醒時亦醉醉亦醒

題瀑布障子

青天下白龍倒挂碧芙蓉疑有雷霆響能搖淵壑松空濛失山
影清曠無人蹤祇覺虛堂裏秋烟生幾重

餞春詞和屈宛仙夫人二首

小閣玲瓏響玉環湘簾高捲綠雲閒坐鄰水竹都忘俗脩到神
仙只是閒誤拂落花衣上雨瞥驚飛絮鬢邊斑今朝倍覺斜陽
好天與尊前駐醉顏

酒行三匝更循環情語貪長片席閒纔到中年多感慨偶留小
疾轉清閒飭新食譜勞纖手絕妙文心見一斑莫怪留春春逕
去百花羞近玉人顏

風露茶

雨前猶後要明前摘取無瑕玉葉鮮
不借人工風作主但離烟火物皆仙
浮來雪盃同秋水捧出雲漿豈洞天
除是幽蘭心裏液一般清氣得來偏

戲題子梁豔體詩後

薔薇濃滴露珠妍盥手來吟絕豔
篇畫壁才人爭一日登牆
女已三年襲來芳氣春初動證到靈光月未圓
水樣深情誰比得聰明除是藐姑仙

愁言

萬點飛花酒一尊不須沈醉已消魂
春愁尙自殘年積舊事難將好夢溫
疑有樓臺橫碧落祇餘風月近黃昏
輸他一縷紅絲燕尋得深深似海門

白牡丹

瑤臺飛下佩丁東人世胭脂洗盡空
披出神仙衣縹緲妝成池館玉玲瓏
一時富貴浮雲外三月繁華快雪中
如此朝天真國色笑他沈醉倚春風

散書謠

少年置書不肯讀忽而仙裝忽僧服
學仙學佛兩無成歸發奇書五百籠
四月綠陰吹滿山攤書正對綠一彎
開簾蛾眉宛然笑山欲入座屋不閒
屋上白雲拂窗過屋中古書塞窗破
清晨讀書不裹頭夜舍妻孥擁書臥
忽然大笑笑仰天手散萬卷如雲烟
積書癡與積金等家無長物纔神仙
埽卻蠹魚拋玉軸放入山光補書屋
客來若問舊藏書孝先自拍便便腹

太湖舟中

只有天圍住清光萬頃圓四無雲障礙一氣水澄鮮日映鷺背
雪風吹帆欲仙蓮花波上立知是莫釐巔

端午日謁叅師吳江官署

使君前月始停驄佳氣葱葱滿縣中芳草未除官案綠榴花爭
向印牀紅烹鮮自有葵臯手襁紵何煩艾虎功洵得此心成百
鍊一泓明鏡照垂虹

山塘雨中

畫船簫鼓淨如雲一片空濛漾綠津似厭土風誇競渡故將絲
雨散遊人雙隄水氣猶含酒五月花光不斷春放櫂獨來還獨
往勝侬晴日輭紅塵

風木圖爲錢塘顧虹橋秀才磨微題

紙上悲風起孤兒一片心縱橫皆血淚點染作楓林攀柏王裒

感循陔東哲吟愁看庭下樹反哺有霜禽

我亦同孤露終天恨獨私裏尸惟有草輿櫬竟無兒俯仰餘生
在劬勞慟哭遲對茲風雨色淒絕卷還時

先大夫以乾隆五十二年從征巴勒布亡

余兄弟俱不獲侍側

晚霽佇月

雲欲弄晴天未肯灑然涼意佇瑤階掬來清水空盈手夢見前
宵似入懷纖影忽穿斜漢出近身還有小星偕花陰守到黃昏
近便得饌餬見亦佳

泛舟湖橋觀水上諸峯作

出郭見西山諸峯秀相接一峯一蓮花橫插青天入落影澄湖
中蓮花皆倒立蕩舟波震搖空翠碎難合層層雲中寺反向天
心壓惟有松濤聲湖流不能納清風破空來長嘯與之答仰視

青崔嵬猶疑浪痕溼

夏日同人遊小石洞分得綠字

山遊如行文所取奧而曲連峯秀無盡古洞作一束陰森變昏
旦涼燠違世局激潭凜人心鑒影起膚粟俯疑秋氣深仰見夏
陰綠不知蒼蒼外自走驕陽酷此時熱中人襍穢方暑觸

雙仙歌

書中仙號茂漪詩中仙名婉兒一雙玉貌天人姿帝命來作人
閒師授我五色管一枝令我揮灑筆陣圖應詔昆明池昨宵寫
作大出奇從容奏進鋪丹墀玉皇霽顏王母笑賜我白玉蓮花
卮醉中起舞狂且癡左呼昭容爲我拂箋素右呼夫人爲我研
隄糜風驅雲涌電擊馳頃刻銀河漲墨都淋漓醒時悔懼輾轉
疑夢中醉態狂無知皎皎玉尺能量詩亭亭簪花獨冠時落紙

每恐爲伶期絳紗未必收義之公然竟敢設妄想屈作帳下雙
瓊姬急須懺悔向空拜幾乎空中鐵鞭鞭著蔡經背

夏至日竹橋丈招集似園子山詩先成卽次其韻

酒誥重德將賓筵戒側弁結交如飲醇豈在肴與饌入座先溫
溫謙若耕讓畔旣分左右筵各從少長便躋我白髮叢西僧住

東院

是日設兩筵東則松阿園公諸老
輩西則子山諸君余獨居東之殿

右繪洛社圖左設南皮

宴誰爲萬選錢首數蘭陵彥愧如沈郎鑄亦被劉守選不撤公
榮飲聊設穆生薦許事那用知且食蛤如蜺七種翰林壘八珍
大官饍烹調似文章老手妙點竄卻嗤世人愚設想多夢幻思
入護世城期噉胡麻飯何如眼前景燕飲樂且衍茲辰景風來
新荷碧筒卷旣欣羣賢集且感時物變雖苦小器盈敢拂巨觥
勸夕陽照筵前催促人影散歸乘舴艋輕倒著接羅岸明晨索

和詩怯敵手忙亂如將色爲喻我醜定勿遠

竹橋和云明乞君詩好匪色好毋違

戲翻其語

竹橋丈疊韻索和復呈此篇

似園卽真園羣木聳如弁園花足清娛園菜足新饌前軒臨河濱後閣枕田畔一二素心人拏舟往來便先生曠世才供奉祕書院曾登蓬萊巔親侍瀛海宴蒼生仰斯人同列服英彥忽懷邱園樂卻避棟梁選投簪慕疎賢脫繡謝雄薦秋風網鱸魚春水撈蝦蜆十年林下身手自潔親饅世事如浮雲蒼狗忽奔竄赫赫貂蟬榮紛紛蜃樓幻不聞清晨鐘肯醒黃梁飯或有賦歸來亦復耽燕衎狂呼帽必欹痛飲席屢卷斯爲酒肉交未醉態已變孰如茲堂中文酒各醇勸論園不必園花木轉清散牆根老楊柳屈曲似臨岸曾見手植時今條已紛亂聚首能幾何相

親莫相遠

翁芝虞山圖

鵝溪絹長十八尺端盡虞山全面碧八居城外二城中遊蹤首

及巫咸宅西爲致道觀上有乾元宮招真古碑簡文撰至今花

帶蕭梁風吾家山房

大石山房吾族西川公別業

更奇絕一片苔花繡如鐵

日月長從石上生烟霞自補牆邊缺春三二月桃花明人從翠

微穿出城或呼舴艋或欸段天然圖畫中閒行三橋楊柳翠欲

滴士女如雲看場塞踏遍巖公

嚴文靖公封公

墳上青雙鬢門殺春山

色山色尤奇拂水巖飛泉高挂珍珠簾有人遙自青冥裏倒坐

籃輿下洞天巖腳山莊

拂水山莊廢已久

小楞伽

嚴栳別墅

更今無有遊

人遊只到山前自謂看山十得九豈知西去山更青一峯一態

無定形湖光倒吞山矯矯山勢下壓湖冥冥有時烟雨變諸色

平奇濃淡山之靈可惜畫工畫不到轉北峯巒更奇妙天開古
洞白雲中尙父會傳一竿釣何況北山山更深蒼崖翠壁多叢
林譬如畫人只畫面背影雖好誰撫臨何時更買東絹逕十丈
盡寫嵯峨削劣之烟岑寫成非作壁閒玩寄與吾鄉執官遊客
紛傳看

風潮

愁雨已三日如何風更狂庭流潛入戶鄰樹忽排牆街路空行
屐河橋礙小航高鄉計猶可最慮是低鄉
近夜風尤急雨聲殊未休奔騰天作海震蕩屋如舟暗覺房櫳
漲涼生枕簟秋燈前且相守笑慰老親憂

雨霽

萬事天難料新晴卽在今花收辭樹淚鵲定護巢心修竹東鄰

失淹流北戶深急須謀遠眺四野幾升沈

養病

炎風如炙透輕羅偏是文園觸疾多揣意何從邀郭玉參禪誰
爲伴維摩平添酒債兼詩債難遣情魔更睡魔可惜藕花生日
日藥爐香裏枕書過

張孝女

孝女名蘭枝冬月母疾以身熨母剗股肉以進病益
亟女號哭氣結死母尋愈家人謂女籲天請代也余
爲作詩以明其志

貼肉衾母母如紙兮剗肉羹母母如水分生是親生兮親生勝
生熨都梁兮籲穹蒼兮神渺茫兮性則愚兮計則迂兮人所嗤
兮天聽卑兮匪天之能聽兮其志之自定兮乃其性兮而非命

分

大雨後登桃原澗觀水兼眺田疇

昨宵銀河忽傾瀉朝來羣峯失翠微青天絕無片雲影但見白
龍天矯空中飛懸崖直落勢千丈巨石橫衝忽分兩碎作大珠
小珠滿澗跳又被微風倒吹上左盤右折古樹根根與水激成
雪痕飛流到此作一曲石巉路滑潛蛟奔萬壑砰訇怒雷起忽
疑在天忽足底松濤寂寂鳥不鳴細聲并入大聲裏是時炎官
火繖張我獨微雨霑衣裳不知人世有炎暑勝如赤腳快踏層
冰涼卻憶田家正作苦高峯下見泥斥鹵西北平原秧透齊東
南淹浸不可補東西苦樂勢不同歌聲哭聲來水中哭莫悲歌
莫喜不見乾隆乙巳秋西北赤地數百里萬事循環有如此

企踰歌

健兒好身手彎弓肆馳突不敢仰射鵬恐墮青天月
太白當營門寒光射人面拂拭青海驄明朝恃爾戰
夜合陰山圍單騎入虎穴血飛紅如花刀飛白如雪
墮地爲男兒毛錐不能把手拓萬里邊功成令人寫

看劍

不舞已如此寒光四座驚陰風隨手發駭電繞眸生匣裏眠三尺
身旁抵萬兵奇鋒世難用非獨爲昇平

六月菊

暑月疑逢青女神東籬寒豔忽翻新羲皇以上陶元亮吏隱之
閒賀季真擔酒白衣應襌襪折腰烏帽暫風塵蓮花相見休相
訝熱客場中有冷人

西瓜燈

雕青刻翠瑩如精仙手玲瓏妙削成刻出丹心偏照耀透來重
膜尙聰明薄于形迹方知巧煖在中間始是情直認匏瓜星朗
徹通宵抵得月華清

藕花歌和麀客丙辰歲作

亂紅插水水拂霞香清清遍邨人家遠山倒影不得入隔隄自
透青蓮花船停花中風四面罩船弱柳垂青綫空明一片綠玻
璃無數紅妝鏡中見坐來忽疑不是船此身已在銀河天天孫
手織雲錦段被風吹作花如烟何人折花聲肥絕雙鬟嬌愁小
童劣主人惜花又愛花手把亭亭不能說酒酣脫幘興愈多手
掬珠露飜青荷蜻蜓翅輕蛺蝶小有福占此生香窩何時化身
花上坐舌底生蓮隨咳唾不然翻身學水仙竟擁紅衾抱花臥
年年水雲六月涼華滙十里九里香今年盛夏大風雨傾下萬

斜天瓢漿讀君此歌我愁起回憶去年如夢裏火雲燒空天不
秋零落紅衣一池水

友人召觀女樂

三千楊柳蕩春風十萬桃花壓水紅我是秦樓舊簫史人間筆
笛洗都空

孟秋五日夜夢短衣荷戈作從軍狀得詩云云醒後忘
其五六爲足成之

出門離別思都被酒消除箭鏑星皆落刀光雪不如掃氛清海
甸洗血挽天渠敢笑書生懦平生祇讀書

夜登西嶺望月

足底松搖萬壑風九霄雲散月當空露華直洗聰明透秋氣能
疏骨節通身世忽移瑤島外性靈都放玉壺中下方仰首知何

限恐有輕烟薄霧籠

七月十七夜

秦楚皆氛祲乾坤自秀靈東南幸安枕秋氣滿空庭轉饒千車
接屯關萬馬停何時偃戈甲把酒看天星
屋角漏斜月不知宵已深一杯同白露萬戶未清砧老大空搔
首安危仗此心屠沽有奇士梁甫若爲吟

孟蘭盆會歌

旋風卷葉半空泣燭花冷閃青燐燿百萬愁冤暗裏來土氣撲
人人卻立老僧身披紅袈裟手撒白米成丹砂梵音縣蠻語如
鳥生人不知死人曉導冤靈旛六尺長冤左冤右無定方饒辱
餒腹性猶在瓦盆嗅著蘭羞香夜半衆聲嘯如雨維遯紛爭爾
汝語相依豈必子孫家才了殘冤只依楮衆中一聲知鬼雄萬

聲辟易趨下風獨吞香米恣一飽餘屑滿地分者少臺高月黑
星斗橫召以法鼓退以鈴紙衣露溼重於鐵金銀墮地虛無聲
此時狐狸竄荒穴頭戴髑髏口白骨

佛手露

金果熬成玉液新妙香濃滴露珠勻似分楊柳餅中水合供蓮
花座上身朗潤欲流仙指掌清虛猶貯佛精神兜羅縣手晨親
浣絕勝薔薇一種春

畫梅一幅附以水仙蘭花

姑射冰羅浮月月爲霓冰作骨塵之益瑩霜之益貞水仙其性
湘蘭其情國色色無雙國士士無對衆香雖氤氲吐哉絳灌輩

呂節婦操

常州呂廷棻妻也結褵兩月而寡事舅姑孝撫姪爲

子今有聲庠序矣有司旣旌其門余爲絃其事以俟

采風者

呂節婦系蘭陵頭上著纓几上儷皮元纁云字河東呂廷萊

寢脩入門謂來請期匪來請期來告呂氏子病旦夕不可爲

父母跣躄謂且改吉親戚諷諭恐非子匹載告父母心已許

作呂家婦兒命有嘉耦自得偕老白首脫纓入房纁并上堂

舅姑憂且喜喜者婦憂者子朝視湯藥莫視湯藥爲新婦兩

月衾席不得著夫執婦手執手斷腸汝欲亡汝不得亡汝視

堂上髮如霜汝稱未亡未亡人歡顏上堂酒如飴肉如糜堂

上嘻嘻不知無膝下兒未亡人滴淚下堂黃口是吾姪黃口

是吾兒父邪師邪身兼之昔日黃口兒今日膠庠士爲子婦

抱子子寧知母也椎心飲泣三十祀解大吏入告帝曰嘉

汝節錫之綽楔爲女宗式十一解繡帔章身珠冠耀首鄉鄰來觀
云是呂家兩月新婦十二解

張甥伯溫隨父入都中道奉母喪歸兼遭妻喪以兩棺
停西郊子身北去詩以送之

叔治思親感安仁悼婦情重哀關至性並避惜吾甥枯淚餘鄉
土羸軀更遠行難將珍重意說與寢苦生

別去寧無恨雙棺野外存敢云遲兆域惟是念晨昏已曠嚴君
省兼懷大母恩荒祠風雨夜淒絕望兒魂

題張孝女徵詩冊後

生死如堪代從來理所無鬼神殊杳渺兒女本迂愚至性憂成
疾勞軀急則殂如云籲天請真孝反教誣

九日登破腹寺

秋爽高無極蒼然橫北峯雲中有雞犬天際若芙蓉瀑雨將花
氣疏林落翠濃仙人渺何處樓閣自重重

飲盡一盃酒亂山多夕陽出門看紫翠雲樹極蒼蒼天半落人
影空中生佛香樵夫不相識相答浩歌長

月華歌

紅如陸渾山上燭綠如瀟湘水一片翠如羽白如練黃如黃金
紫如電頃刻續紛百千變多是常娥鏡中見常娥之鏡體本虛
鏡臺遙對樽桑株氤氳摩盪氣有餘陰精爲炭輪爲爐中間老
兔弄光怪飽吸陽精日爲憊吐氣一似重輪圓山河變作金世
界偷傳玉皇五色筆召取海內百寶充其窟海水消龍王朝龍
母貢明珠龍女捧蛟綃龍子後至鞭其驕寶光直上千雲霄常
娥高高佳虛空碎搗七寶脩其宮大徵女媧所煉補天石更索

黃帝自鑄昆吾銅脩成八萬四千戶戶多用天孫雲錦爲屏
風此時金烏臥滄海青天翻教太陰宰羣陰相輔陰有權月御
纖阿亦生彩三十六天眩若旋二十八宿驚無顏脩羅藥叉識
寶氣各各交戰爭其間世人眼花不識月華大呼出看月華驚
散月非禁人識其實要人仰視須悄悄

左蘿石菊花橫卷

一叢色深一叢淺忽而隱藏忽而顯直把淵明一片心寫作縱
橫大長卷直如此腰不可折曲如北窗枕暇逸數枝離披不收
拾尤似東籬醉時節九月十月天降霜霜中習習生寒香能將
勁節拗天地不與百卉同披猖我聞疾風知勁草此花堅貞尤
所少蘇武能禁齧雪寒文山自願黃冠老豈是尋常隱逸人逕
須畱作忠臣橐

送人之甘肅

十月臨洮道無風雪滿山一杯從此別西極玉門關楊柳羌人
笛燕支少婦顏送君秋色裏惟有莫雪還

題陶廣文集

十年枉識陶君面祇道東籬一酒狂今日把君詩在手西風吹
過菊花香

蕊宮花史曲

我昨遊戲蓬萊宮繁花亂插天玲瓏中有風裳水佩仙人蹤邀
翔雜還如游龍或折絳雪來芳叢或采元芝出波中或攜膽甌
或筠籠或揮宣毫或絲桐或書或酒或畫卷或坐或倚或舞如
旋風我亦五色眯雨瞳鬱氣震蕩心忡忡欲往從之不可從江
清海碧天橫空上帝忽遣玉局翁手持綠字芝泥封謂我前身

上清董筆能生花奪天工宜領花史職住此東海東賜我錦洞
天白玉爲垣墉錫我金頂帳密密天孫縫命我總司一十二司
事羣雌中立一崔雄臣拜稽首謝鴻濛請宣衆職某某供帝曰
疇司梅僉以梅妃充曰咨汝采蘋愛梅汝情鍾宜代壽陽職上
居羅浮峯蘋拜稽首讓道蘊帝曰汝往毋謙沖汝道蘊國色國
香付汝躬汝家庭多蘭熟悉灌漑功蘊拜稽首讓之潘楊暨蘇
蕙帝曰往哉惟汝庸號國汝素面本似梨花容玉環汝新妝領
此一搦紅汝潘居環榴錦窠最繁穠夷光越溪女命汝主芙蓉
蕙也回文實思婦汝主秋色牆陰濃疇典金粟藏麗華名與嫦
娥同疇掌黃金英佩蘭手泛寒香醲疇司拒霜僉曰花藥可汝
權成都代臨卽讓于袁甄帝不許銷城管領秋重重司花汝寶
兒奇種不易逢權領都勝補子月絕勝迎輦來高嵩水仙姚女

花洛浦波溶溶惟汝甄后宜職掌以殿春夏秋及冬咨汝一十
有二司乘除代謝環無窮指揮悉聽花史令予嘉汝績罰汝慵
汝花史乘御史驄往監羣司明以聰掃除蠹蠅及奔蜂護之金
鈴與珠櫳情波爲雨露意土爲培壅四時調養風冲融芳信阻
遏汝則通汝能憐惜契予衷加汝衆香國裏溫柔公

有諷余詩側豔者書此以答

偶然觸手便生春波上桃花鏡裏身兩戒未能空色相萬緣方
悔誤因循陳思洛浦原如夢宋玉高唐只是神誰把南華顛倒
讀彊呼秋水作佳人

圓轉清吟似佩環風情昌谷玉溪間題成隱語何曾隱賦到閒
情不是閒藕縱有心難改節竹如無恨豈生斑采唐折杞分明
在畱待人閒祭酒刪

石屋觀楓絕句

開到黃花花事終送秋連日雨兼風濃霜卻似還丹藥駐得衰顏老更紅

淺絳深丹夾翠巒西山紅潤北山乾若教刻卻青蓮朵面面桃花更大觀

逕策紅藤上翠微四山秋埽綠陰圍卻餘幾片天孫銷盤古當年作舞衣

秋去人間纔幾日藤蘿青影也都無此中不改霜前色只有蒼松一兩株

卻憶洞庭秋草黃楚天雲樹極蒼蒼漢皋木落人何處腥血殷紅繡戰場

此間神女散天葩不是尋常二月花身坐白雲中倒聽萬山秋

響赤城霞

十里山容豔入城湖光蕩漾銷分明冬來慢說山如睡纔醉時
還夢未成

石屋天開雲半間樓臺多挂繡幢殷世間無此天然畫小李將
軍著色山

吾谷丹楓世所推西川高士手親栽今日亂紅凋落盡夕陽影
裏墓門開

小舟如葉任風吹坐愛霜林返櫂遲如此清遊能有幾江南終
是太平時

壽叔母

采采芙蓉花花貞能拒霜持以娛從母花露清而香十月小陽
春柔風布洋洋鞠脰獻卮酒願母樂以康母顏滋慘戚欲言淚

承睚十七結衿襦十八拆鸞皇下無黃口兒上有慈姑嫜愛媳
如愛女饑飢而寒裳病軀失晨昏慈心爲徬徨翼翼三十年覆
育周且詳未亡何所戀所戀姑恩長自從慈怙隔十載摧肝腸
豈無餌與養不得姑先嘗亦有絲與帛不爲姑身裝坤仁報何
日永負泉臺望猶憶五十時汝爲我稱慶先爲祖母壽跪晉瑤
花觴慈顏悅而和我謹侍其旁今日猶此觴今日猶此堂獨少
白髮人笑眠斑衣行有酒那忍飲飲亦徒摧傷聞言悚然退至
孝必壽臧古人慕終身母庶無慙惶豈徒黃鵠操足垂家乘光
寒夜招子侶齧菜

山廚翠玉滿筠筐恰喜開缸冽酒嘗四野民居無此色八珍官
饌遜其香恩叨地主終年力味賴天公幾日霜百事可爲惟我
爾齧根休惜引杯長

牂柯悼玉歌

和蔣侯勵宣作也侯令元和愛徐郎名玉者出入必
偕奉使滇南攜至牂柯郡以不習水土死侯哀思不
置爲作是歌屬好事者和之

春花不落日以槁美人不死日以老與爲愛弛彌子瑕寧爲看
殺衛叔寶徐郎玉貌復玉名璫璵聲價輕連城蔣侯抱之若拱
璧不羨弄玉兼飛瓊一朝墮地玉光碎相如失色卞和淚不合
攜花徼外來可憐人命璫璵肥萬里牂柯水嗚咽青天玉化蒼
烟滅一曲哀絃唱未終兩鬢蕭騷白如雪我道郎眞了死生蚤
拚埋玉博深情他時玉貌鬢鬢有未必如斯切念卿

王郎印章歌

王郎十三識奇字十四奏刀工筆勢十五能摹秦漢文屈鐵爲

豪任所使青田壽山昌化紅方圓小大各不同晴窗颯颯風雨
響頃刻漢玉兼秦銅自然變化合古法不肯斌媚參俗工三橋
雪漁赴腕下興到欲掩王山農或疑郎巧是誰使郎曰吾師穉
仙子席子穉仙但工作小篆平生不解雕蟲技郎時停車問偏
勞穉仙教之滂與喜遂從筆法悟刀法其實郎竟無師耳嗚呼
無師之智能過人雖曰小技通乎神與之角者奪其齒十五技
精十五死死可不死賴有此生十五年死百祀世有楊王姜趙
好古徒得郎一石如一珠人生妄學屠龍技老大無能愧此矣

邵君

慈立

尊人水部公以豪華見稱與先太守爲中表

雅相善也水部公歿君方在襁褓家遂落稍長寄食
四方今冬從桔橈歸投詩見贈奉答二首

有客歸從十洞天新詩投我剡溪箋家如東野窮逾妙人似西

華瘦可憐，明月光寒。珠在水，梅花香凍，鶴橫天好。攜蠟屐清遊，去笑覓洪崖共拍肩。

卻憶烟雲卅載前。郎官丰采，紫裘鮮歌，殘碧玉空如夢。手散黃金，立證仙世業，種瓜無隙地。交情累葉，有深緣五陵衣馬翩翩。甚只守南山水碓田。

竹橋丈惠書閒情賦聯句奉謝

先生筆有神

孫原

能斂亦能放，縱若春空雲

席佩蘭

卓如秋插嶂

真行各體裁

原

大小悉心匠，尤工二王法。蘭佩頗近八分樣，爲余

書閒情

原

出手比珍貺，千字千明珠。蘭佩六幅六銷障，行行閒疎

密

原

筆筆分背向，老樹無醜枝。蘭佩簪花得妍狀，義獻寬若追。原

劉

石梁

手可抗紛求，勝鐵門蘭佩秘弄宜寶藏，石經苦傳觀。原

清悶聊供張

銀箋

珠露垂蘭佩粉壁墨雲漲，滿堂爭色動。原陋室

頓神王終須避燥溼蘭佩行且別裝潢千秋大令帖湘原四海毓林

尙烏金揚旣多蘭佩玉版刻無恙一旦先生書湘原竟思出其上正

如陳思賦蘭佩文采喜跌宕自從閒情出湘原遂使洛神讓妙文得

妙書蘭佩妙絕古今曠兩美合有時湘原二妙并允創豈惟詩似陶

蘭行誼亦相望屋中五男趨湘原門前五柳颺四十早休官蘭佩又

一陶元亮湘原

寒夜卽事效劔南體

卻下重簾未展衾爐灰撥盡漏沈沈書將子課如親讀詩共妻
聯勝獨吟梅影自移燈易置茶香聊當酒頻斟寒宵氣味清于
水只有涼蟾似此心

贈葉莪生從事兆謨

安得隱湖水春來盡綠醽與君長夜飲但醉不須醒百里蘇臺

月相思夢杳冥東風吾語汝莫放柳條青

時君將入京洛

族兄

錫爾

于嘉慶初元客遊羅山時值楚匪延擾客心

不能無恐越明年得疾卒詩以哭之

隔歲我歸君北去片帆遙送入中州正逢小醜縱橫日偏作孤蹤汗漫遊初客未嫻南事警孱軀寧耐北邙秋早知旅櫬成漂泊只合茅亭守白頭

謁盧忠烈公祠

鉅鹿城南甲光黑督師單騎揮刀入左軍挽馬勸公出瞋目大呼逃不得不患不生患不死不疆場死西市身被數創集四矢手殺百人猶不止與五千人同日死五千人者皆餓卒不戰亦歿戰亦歿是時中官擁重兵距公死無百里程明朝公屍橫血海屍上伏屍楊陸凱二十四箭叢叢在守臣驗屍誰耶一

卒獨指裋衣麻抱屍起哭真盧爺公昔殺賊數十陣蹋陣雄呼
無不勝賊人膽落盧拌命一從奉詔赴勤王內格輔臣楊嗣昌
輔臣主和臣主戰臣讀張巡岳飛傳何人不戰不奔喪便合身
膏尙方劒奈何不許公殺賊又不許公善應敵敵旣三重圍賈
莊賊延秦晉及鄭襄明乎明乎胡不亡明亡雖則由天意公亡
實出樞璫計我欲鐵鑄起潛與嗣昌長跪吾公廟祀旁

胥燕亭大令

繩武

鳳臺人罷官西江客遊江左往來松

陵陽羨間有終焉之志作杏花春雨圖屬題其意

君今不樂吏折腰拂衣徑鼓雙蘭橈東風拍拍向何處遙指紅
欄四百橋一重樓臺一重樹葉葉枝枝吐香霧不識黃塵但識
花人生只合江南住江南二月春可憐細雨溼衣紅滿肩故鄉
雖好不歸去有夢只落閒鷗邊珍珠絡繹珊瑚鞦韆輸此笠屐偏

翛然我亦澹蕩人與爾春風顛一蓑同載烏篷船萬事不理如
雲烟君今欲買陽羨田急須了此青山緣慎莫孤負初春天不
見肘繫黃金官將相日望江南在天上

燕亭客任城時愛歌兒佛喜及來江南劉君六橋寫其
妹四喜小影寄贈時佛喜已嫁儵父燕亭作生祭文
弔之屬余題後

顰婆一曲暗消魂司馬青衫溼淚痕可惜虎頭工點筆卻遺桃
葉寫桃根

天涯淪落見何時生祭文成兩鬢絲恰似悼亡唐後主爲伊尋
葉又牽枝

西菴同椒卿作

一逕踏殘葉白雲爲四鄰年深三古佛歲莫兩閒人梅萼常含

雪松心不破春未須尋拂子吾意自無塵

晉平西將軍周處袍笏墓

在宜興城東

蛟不可使爲龍虎不可使爲麟人不幸類蛟與虎生爲人患人
非人長橋湯湯蛟血赤南山蕩蕩虎無蹟一患能使二患除此
一患者能讀書爲龍爲麟惟我耳英雄變化物不如易全文武
才難全忠孝遇策馬觀西戎安能北堂顧五千人當七萬卒一
人提戈入深穴仰天一呼衆士奮一萬頭顱落如葉前軍已盡
後軍絕左右兩軍竟不接彤乎彤乎爾喪師大臣殉國吾何辭
孤墳我我土高築以笏當骨袍當肉當時父老爭怨嗟此日鄉
人競尸祝將軍學道儒者流將軍爲國忘私仇不然手挺丈八
矛何難竟取梁王頭不見斬蛟如斬蛇射虎如射牛

歲莫陽羨雜詩

銅官山色最相思放權重來歲晏時阮藉未歸韓偓去辦香獨

拜大蘇祠

時阮師奉調赴省韓旭亭都講已歸吳門大蘇祠在蜀山書院東偏

消息驚傳自隔江人閒竟失魯靈光天教海內龍門閉纔死弁

山又小倉

燕亭自維揚來知隨園先生于十一月十七日已歸道山弁山謂秋帆尙書

護花新句達郵籤不避延年郡將嚴今日萬人同一哭獨應胡

廣爲掀髯

時方傳誦隨園嘲昆陵太守妓禁詩有罵賊當年毛惜惜絕勝胡廣號中庸之句

晝畫溪流冷不香祇餘頽禿幾垂楊桃花從此依崔護無復天

台賺阮郎

小史慶兒役陽羨署有年今夏爲吳江崔少府劫去

欸到禪扉夕照遲松閒啜茗更看詩阿難年少工微笑便作拈

花大導師

西巷僧貫一年十九主席已四載壁間有韓旭亭贈詩

茅籬土舍幾家同幾箇雞皮雀髮翁單爲美人名字好賺人閒

踏夕陽紅

美人巷在東倉右側

小紅一樹不知名老去爰絲尙有情我是街西狂小杜看花雙

眼最分明

曲中某曾爲隨園所賞寄阮師札云只此一校可當老夫霧中之看

章江舊令最風標詞客張姜話共邀提得謝元香玉麝費他官

燭兩三條

與胥燕亭姜易齋張椒卿夜話燕亭舊官西江

雙鳧去日萬民傳父老排門肅餞筵祇覺此閒風俗好教人忘

是長官賢

時阮師調任武進臨行焚香設酒者接席于道

布帆臨別且遲開未必重遊第七回照影東西雙沈水湄蘇來

後我曾來

自乙卯至今遊蹤六度矣此番未卜重來書此誌感

雪夜同內子

萬籟一時寂暗窗疑月生頓添肌綽約倍覺語聰明冷澹光尤
豔鴻濛氣轉清梅花三兩點已漏早春情

小除夕前一日有持文待詔書丁巳除夕詩求售於吳

竹橋丈裴池雅潔以兩緡錢易之持以見示詩曰易
卻桃符拂卻塵窮愁殘病總更新三彭漫守庚申夜
萬事重迎戊午春狼籍杯盤聊復醉盡情燈火笑相
親孫曾次第前稱脫一字非壽則賀慙媿承平白髮人按明
史文苑傳待詔以嘉靖三十八年卒壽九十丁巳爲
嘉靖三十六年八十八矣而精神意氣于字裏行間
猶可想見今歲適次丁巳上距嘉靖丁巳二百四十
一年因次其韻以紀翰墨勝緣又按待詔長子彭彭
子元發元發子震孟見文肅本傳及朱檢討曝書亭
集文處士點墓志詩中言孫曾次第則文肅是時已
露頭角一門數傳文采氣節皆不可磨滅然則是幘
之令人想慕者微特詩與字已也

仙館停雲化劫塵流傳翰墨尙如新文孫已見庚寅降易代重
逢戊午春真迹于今歸勝賞忠臣自古有賢親滄桑二百餘年
事幾箇人閒不朽人

天真閣集卷十一終

天真閣集卷十二

詩十二

昭文 孫原湘 子瀟

著雍敦牂

元旦雨

一壺煙鎖少人過，惟見紅箋遞翠蘿。
溼土融春催物醒，暖風噓氣入詩和。
東南自喜年豐屢，楚蜀猶聞夜警多。
願賜甘霖三日，遍普天兵甲洗銀河。

春雪

西風一夜響疏櫺，潑水衾裯夢易醒。
起坐月迎人面白，開門山失佛頭青。
神仙忽見瑤宮闕，卉木都含玉性靈。
似惜梅花太清瘦，畧添肥豔更娉婷。

人日偕凌客過鄰洋閣將滄茗治具矣主人忽爲夫已

氏邀去偶詣子侃欣然設酒斫鱸談宴極歡同探梅
城西作

爲訪春晴先訪友東家就食忽西家慢啗燒鵲承譌謬恰烹烹
鱸辦咄嗟世上萬緣如此日尊前一醉借梅花靈風吹我詩情
動踏溼何辭趁月斜

子梁招宴鄰泮閣食單奇雋羹有玉齏玉糝記問漿有
雲英沆瀣天花粥有水芝蓬萊蜜合酪有八丹雪乳
湯有鳳髓益肺玉燕雪卵一杏二薑三甘四鹽諸名
皆宛仙夫人手製也充腹之餘銘肌載切謹賦詩陳
謝

何曾萬錢水陸窮文昌百婢烹調工君家食單更奇絕一洗萬
古珍羞空不著亦不醴不箸亦不觴先以五花露滌去俗肺腸

須臾芳馨騰滿桹仙瓢各沍天廚漿味不一味名香不一香擅
斟酌甫得之欲語忽又變主人大笑無他奇只費千鍾兼百鍊
渣滓悉去精華存咀嚼無勞但吞嚙如蜂釀蜜采百花成蜜卻
無花一片始悟來時玉杵聲瑤漿細擣煩雲英蔡經何敢望鳥
爪彭鏗竟許斟雉羹仙乎仙乎不可名絕非人間煙火能調烹
醅醕灌頂身自化沆瀣濯魄神俱清卻憶頻年宴此屋一回一
變無重複恰似文章妙手成不留一字陳言熟主人夫婦俱工
詩夫人清新尤我師平時熟精文選理下筆一氣能空之卽將
此法製食譜廚孃竈妾烏能知吾儕口福苦淺薄謹謝蘭羞換
藜藿寧折平生祿食簿絕勝孤進還丹藥夫人報語曰不然憫
爾凡質求詩仙特將一點文心妙暗託調和五味傳

元夕

只有青天不染塵新年月色洗如新美人爭踏星橋夜陋巷都
開火樹春花氣獨教孤客領詩情偏共一燈親喫蘆菹飯成何
事冷惜風前小病身

赴暨陽舟夜

孤櫂發清響短蘆沿岸隈魚跳知水煖犬吠覺邨來靜月窺詩
夢行雲入酒杯暗香何處動前路野梅開

自暨陽至毘陵百六十里夜半發櫂清晨已達城下

暨陽城頭打四更清晨已見九龍迎東風如箭吹船急終夜不
聞搖櫓聲

阻風遇雪

殘月白紛紛推篷不是雪五更寒出夢一夜靜無聞清氣舒龍
嘯孤舟入鷺羣前邨老梅樹昨日正思君

送梅曲

東風吹愁入芳草羅浮仙人思遠道遠道何漫漫江南春正繁
山空月明迴愁絕落花自與春無言素琴高張對青天此曲有
恨誰爲傳願爲流波照君顏長相思心斷絕望後月春前雪夢
中縞袂翩然來覺時星斗空徘徊輕雲冥冥天欲曙白鶴橫江
一聲去

盟蘭引

春風自多情吹我蘭氣蘇芳馨雖未傳得氣清已殊空房美人
病初起碧紗如烟翠鬟理天然秀色不由人顚顚何嘗減西子
影娟娟兮送媚氣霏霏兮含香雖託根于玉階夢不絕于瀟湘
不采羞自獻衆采非所願素心開徐徐以待君子娛君子日以
老素心日以保兩心如一心豈係顏色好

瑶臺篇

梅花一熏凡骨仙清夢欲上非非天不知何生脩得到飄然已
在瑤臺巔瑤臺中人皎如雪洞啓蘭房鑄秋月埽盡輕雲四面
空牕櫺挂起湘江碧水綠似葡萄醅玉龍倒噴玻璃盃醉持
珊瑚敲赤日天花亂落心花開紫陽真人喜跌宕邀我吹笙和
鸞唱清歌高卷入晴空曲與行雲共搖漾隔屏似花不是花春
風來揭輕紅紗千秋美事寧有此姮娥竟在天孫家博山爐中
紫烟舉飛出青天忽雙縷直是仙人一寸心依稀聽得幽蘭語
寶刀割香香不斷香縷穿珠珠不貫一日一月合幾時雙影分
明在天半天雞夜叫海水橫嶺精兔兔紛相迎玉軀聲杳廣寒
閉頓覺河漢無光明臺前一聲飄玉笛臺下落紅深數尺脰有
瀟湘烟水寒風吹一片無情色

招真治老梅歌

招真館中梅一庭繁花插破青天青到門見花不見屋俯花而入穿花行就中老樹尤縱橫逸出牆外顏前楹超然高壓衆花頂不肯下與人逢迎初疑瑤臺一片月又疑峩睂太古雪有時雪月并入來始覺寒香獨清絕少時看花花更密平地落花深一尺近來道士頗翦卻時有天光漏其隙從來盛衰乃物理二十星霜已如此焉知更歷數十年此樹不化爲雲烟不然或且高接天不然或蔭數晦園卽看蕭梁所植檜宋時已作龍鱗纏觀中七星檜相傳梁天監中物今存者三其四係宋時補植當時遊人憩樹下豈知五百年後七星猶立瑤壇前昨日不可憶明日不可知春風此時來且與花同之不見西南黑祲蠱天起楚蜀兵氛未清洗秦松漢柏徒紛紛兵燹所被空如雲但願東南不及戎馬足人與花同太

平福

內府項易菴天寒有霍守梅花圖彭尚書

元瑞館課以

命題首唱成詠西清咸有和作余亦次韻

天寒誰共梅花住惟有胎禽世外姿已是山空長笛靜更無人
立短筇支林逋子在家堪守丁令仙歸月自隨珠樹作雲迷野
徑羽衣如雪護疏籬瑤臺只用巡簷認嶺應憐入夢遲冷到
忘言雙影瘦清真徹骨兩情知香傳內府通神筆春在尚書絕
妙詞安得置身圖畫裏親騎霍背看南枝

昔夢謠

我所思兮在九疑雲鬟綠紉遙參差春風一夜動江水逕渡不
使湘雲知黃雀負我影舉翅摩青空明月飛輪拂人面下眊卻
在江流中江月白皜皜疑是湘妃顏色好湘妃解佩不復還石

上清猿啼到曉手攜綠玉杖西望蒼梧雲九峯若連環秀色不
可分左旋右迴百千折烟蘿紛紛弄暝色一谿初明十萬花蝴蝶
蜨大似仙人車紅霏微而結霧翠天矯以橫霞電光西來衆水
怒立蛟龍人行下見城邑虛無縹緲非人間我能從容究其原
幽微靈秀別有在茫茫天外皆青天三十六峯插紫冥但聞水
上彈湘靈微風吹來巫峽雨散作飛花滿洞庭飛花拂人衣昔
是今已非盼蒼烟兮向壁掩餘香兮在幃夢可遇兮不可求羌
不見兮心煩憂淚痕何斑斑灑在秋竹竿竹上之淚猶可滅此
情萬古無斷絕鐫天一片識此情杏花如雪初三月

早春夜集飲古梅花下分得於字猶字二首

梅花淡如水吾與爾相於香逐輕烟散迴風拂翠裾山空明月
在春煖碧雲疏醉索佳人笑嫣然或起予

片雲橫夕秀人與共夷猶星影杯中注松聲天外流語來春欲
笑清極夜如秋玉笛吹清怨飛花又滿頭

花生日閨人設酒果以祀花神因招竹橋諸公爲花飲

福

早鶯啼破曉晴天脩得天緣事事圓兒女盡知今日好神仙應
喜後身妍窮愁賸有雙眸福豔事明當萬口傳手把金尊轉惻
悵幾人長健在花前

裙屐聯翩花下來綺筵分作兩瑤臺藏鉤各逞文心巧賜彩多
經妙手裁詩卷熏成香世界畫圖縮得小蓬萊酒酣笑語羣芳
道旣共生辰合共開

清明日泛舟西郭取醉湖樓

天待春人最有情清明特地放清明無名花自紅當路得意山

看綠進城十里衣香船往復一樓湖氣酒縱橫新晴畢竟晴難
定笑指浮雲日下生

春雨有懷

一夜雨蕭蕭春波綠過橋天寒孤蜨瘦梅落百花驕芳草與愁
積白雲如夢搖知君思我淚早下浙江潮

由破山取徑至三峯

石徑縈紆似旋螺試晴風嫵撲襟和山深松影綠無盡春淺桃
花紅不多度澗蝶衣搖水藻隔林鶯語出烟蘿此來不爲參禪
意自愛詩情秀一窩

上巳日偕子山子侶脩禊

青山隨處是山陰只取羲之放曠心三月三時春漸莫一觴一
詠古猶今溪園竹樹雲皆秀邨有桃花路便深未必明年重此

集故鄉歡醉莫辭沈

春遊

柳趁新晴颺好風三橋畫舫列西東
水含雲葉能爲翠草當花枝不肯紅
一路佛香熏上界九天仙影想遙空
相看只有青山在秀絕蛾眉落鏡中

盆梅結子子梁有縱然結子已無花
之句辭致悽惋余爲解其意

世閒花最是癡情貪落風前博果生
脩得玉顏長自好何須定要子收成

但生佳果似瑤環已勝空飛萼綠還
多少傾城好顏色并無仙種落人間

贈邵童子

名淵耀字充有松阿先生曾孫同年朗卿

廣融子也

十歲能爲古文通達有條理每發一難出人意表經
生宿儒往往瞠焉余嘉其秀疑懼其速成韓子所謂
養其根加其膏者在馴之乎仁義之途而非徒博物
洽聞之謂也作詩以進之

俗儒死章句終身墮雲烟豈惟得天薄誤在襁褓年博陵有奇
童目秀神清妍喜爲古文辭出語驚四筵余尤最心賞中論詩
書篇謂書今古文古有今缺焉兩存皆足寶專信毋乃偏謂元
鳥生商遺卵賜豈天當如元鳥至祀於高禩前不然聖人後乃
以貺卵傳識解最通達辭義無拘牽老成不敢道十歲筆似椽
人言得天厚余意殊不然童生而喪母最得曾祖憐听侍曾祖
飯夕就會祖眠熏染得清氣眠聽皆陳編是爲真學力功在誦

讀先古人養孺子子師擇其賢方其咳名時記成屬左還比及
就外傳情性先陶甄今以碩德爲更教曾孫專宜其穎而達善
養靈明全天資不足恃惟學久益堅願毋求速成願勿見異遷
培爾仁義根沃爾人情田驪龍化頭角霖雨遍八埏脩鱗養未
成且復潛深淵深淵自有耀嘉名當勉旃

三月十三日偕竹橋丈以下十三人泛舟至古石屋展
上巳也分得以字

青山招我游出郭便可喜白雲引人心遙遙去不已輕舟人十
三分載首銜尾舞雪童冠偕六七數可比有酒且先飲有花且
暫艤小山大如拳陡出浪花裏繫纜湖橋西風吹客衣起深林
衆綠交不雨淨若洗雖經翦伐餘未失蒼翠理古洞寒泉清照
見影徹底爲善無不祥焉用濯清泚祓除當濯心豈在塵與滓

故事聊復脩良辰展上巳凡事展必佳局促則終否願乘春日
長清娛極聽眠卻憶十載前同遊某某子或仕或饑驅或遊或
且死惟余與吳公浮沈尙鄉里卽今十三人聚散烏可擬焉知
更十年不散若雲水又焉知水雲不再聚于此萬事隨天緣雲
行水或止所期松柏心毋學彼桃李毋使初心渝而怨不我以

贈秀水王仲瞿孝廉曇

美人忽從天上來入門大笑聲如雷春風欲去不敢去碧桃十
萬花重開世間誰足當奇才豪傑自倒非吾推丈夫意氣爲錢
短黃金手散如飛灰一枝長檜一枝筆四海蕭然子身立有時
高吟華嶽巔青天下聽秋雨泣有時醉舞燕然臺明月梨花盡
無色世無人識張子房縱酒來作江南狂且將草檄殺賊手畫
出閨房睂上柳不然英雄髀肉生安能一日無婦人文章兵法

盡如此離卻陰陽天亦死與君結懽燕市頭當筵鼻息輕王侯
屠刀賣漿皆我輩惟畫俗士如鴻溝落花春滿昭王墳有酒且
醉平原君余既還家弄白雲君亦南來尋故人君不見闔廬城
邊劒池石劒氣化爲脂粉澤英雄自古卽神仙經濟何曾廢聲
色與君且泛尙父湖釣竿手把青珊瑚豫章翻風白日動鯨魚
跋浪無時無

春競渡

識土風也鄉人於三月二十日駕龍舟迎土神李王
於湖田而祀之

兒鳴鉦耶擊鼓邨農駕船逐田祖黃旗大書李王府王身著綠
袍雨水三尺高王袍著紅色雨水無一滴王身有靈天必應盃
筊問王王自定三月二十天氣晴傾城士女多出城橫排畫舫

若比屋中間只放龍舟行大湖田小湖田南划船北划船一龍
驤首羣龍顛掀波跋浪相爭先舟人習水與水戲翻身倒水貼
水眠口銜短橈手拍水以口代手橈回旋更有羣舟鑼鼓聲殷
殷掄竿舞仗百戲陳龍低龍昂助龍勢龍所到處圍如雲別有
輕舟小於葉卻隨龍尾相銜接捷如掠水燕翩若穿花蝶平時
知名不識面今日並船喜相見人看龍舟我看人傾城一日多
看遍日旣傾西天王駕登湖田老龍小龍爭蜿蜒東家西家各
分船須臾仍還湖中水一碧惟有桃花臨水春嫣然

偶書

尋花花不開花開卻錯過待月月不來月來已高臥荆卿刼秦
早項籍入關遲從來天下事難得恰好時

競渡日送春

一條春浪夾紅樓樓下千聲雜笑愁鼙鼓迎回青帝駕蝶花飛
滿美人頭綠陰到眼天然畫白日驚心水橈流歸去誰如君有
福萬家多備送行舟

春愁如水繞孤邨澆與東風酒一尊無物可將來贈別有橋多
合喚消魂地如老去衰顏色天亦情多帶淚痕微雨散盡畫船
湖氣暝獨攀垂柳向黃昏

梅

君未開時節羣芳不敢芳深情天共瘦至潔月輪香一葉都無
藉繁枝盡向陽獨當春正月纔是百花王

蘭

獨得至清氣花中一素王其容兼水月彼美愛瀟湘靜極對宜
遠淡來情更長衆香來取法空谷爾何藏

魏紫牡丹

洛陽小女翦霞裳散作春風第一香
金帶人誇真富貴
芝泥天錫與封章
鄭公娥媚原同姓
梁苑繁華是故鄉
傾國自來多間色
蛾眉幾箇衛莊姜

春夜觀社

六街春社鬧笙歌
綠女紅男踏臂過
香氣霧迷三里遍
燭光星亂九霄多
沈沈簾幙空秋水
寂寂樓臺接絳河
照徹花叢如白晝
青天偏不見常娥

壽房師阮昉巖先生

時從陽羨移宰晉陵

絳紗何福遇歐陽
得備彭宣弟子行
手植桃花滿仙境
身如蓮子出公房
濁醪未載門生酒
清俸翻分陸氏莊
但坐春風無立雪
祇緣披拂是甘棠

文章政事兩縱橫，豪奪江東老步兵。
喜折杏花登上第，願分符竹爲蒼生。
書來祖籍重重福，公隸福州聽到官聲處處清。
一片芙蓉湖上水，是公心迹是民情。

七年陽羨駐仙臆，留犢聲清滿太湖。
官愛常州如玉局，人言明府似冰壺。
全家只飲雙溪水，半壁長懸四境圖。
我是後堂親到客，從無絲竹助清娛。

衙齋新闢養堂寬，花裏親承宦髮歡。
雙佛喜看長老健，萬民爭入問平安。
烹鮮手自監廚婢，戲采身忘見宰官。
解得高堂封鮓意，只供鄉味荔支盤。

公車無力詣天關，重費師門宦俸頒。
送上青雲風自緊，遲徊碧落鳥偏還。
數來知己應居首，話到酬恩已愧顏。
惟有六時香一瓣，永期卷石傍南山。

觀荷

萬頃紅香帶笑開
風裳水佩恣低徊
只餘一角清波活
畱與傾城照影來

蜻蜓蝴蝶兩飛忙
撲葉穿花翅盡香
一對閒邨小兒女
貪撿蓮子水中央

顧虹橋自西湖移家城市將謀遠遊詩來次韻嘲之
我夢西湖在碧天
有人占宅六橋邊
十年常抱花同宿
五夜猶擔月滿肩
清福祇應拋富貴
壯心偏礙作神仙
他時重踏蘇隄路
猿雀相逢定粲然

宛仙夫人與內子唱和梅花詩消暑戲題其後

梅花詩句藕花天
雙管天花落滿前
鸚鵡念來清似雪
鴛鴦繡出妙於仙
思從姑射冰心化
夢在羅浮石頂眠
我爲避炎方閣

筆看他霜月鬥嬋娟

招冤篇

蔣巨卿少尹

繼齋

悼其配莊狀來索詩按狀工吟詠

善吹簫所居凝暉樓嘗有傭嫗能視鬼神指莊及其
妹盤珠曰是皆瑤宮仙吾見其繡衣了髻行空中耳
未幾盤珠死又未幾莊死臨終索妹所書箋爲殉先
是有日者推其年當得七十二纔二十七耳余爲作
招冤四解以紓巨卿之悲

古仙人皆好女子世閒美人愛早死畱得神仙容常在人心
中便是飛璫萼綠遊戲蓬萊宮雞皮霍髮凍梨面不聞哭殺老
奉倩解一生亦不足喜死亦不足哀親者思其賢疏者慕其才宰相
之權能令人喜能令人怒不能令人思與慕若戴高冠作男子

不過尋常一進士

莊嘗語巨卿曰使我作男子如此年不當進士耶

二解七十二二十七

顛倒讀之死則一

祇惜少卻凝暉樓上一尺集孫曾滿前日曾

祖母曰太夫人堂上招寬門外應試服官

三解颼颼颼颼紙錢灰

飛作蝴蝶竟兮歸來壻之側左執簫右秉箏妾能眠君君不能

眠妾此時更呼傭媪來繡衣了

紉真仙哉

四解

竹橋丈以水蜜桃一簍饋貽老母報以楓涇雪瓜

囊盛古帖饌來禽念我高堂夙嗜深懷裏蛻花

橘名憐陸績膝前

羊棗佐曾參慙無獻曝堪酬意想到驅炎合鎮心翻去葩經成

例熟投桃只作報瓜吟

雞豆

秋水無人處花開向日枝輕圓紅豆樣可許寄相思

剖出珠盈捧銀匙滑欲流贈君無別意此物最溫柔

秋林小幅

西風渺何處吹落洞庭霞散入千峯翠秋來盡作花蒼蒼白雲外疑有仙人家此卽桃原矣桃原何足誇

澄江舟中

小艇如天上孤雲無所依樹臨秋水靜鳥背夕陽飛客夢三年換鄉音百里非君山青一抹烟外辨依微

夢遊芙蓉園歌

芙蓉江上思冥冥四面芙蓉插翠屏欲采芙蓉隔江水滿船秋月照人醒何處天風塔鈴語雲中吹墮瑤英女自言生小佳蓉城阿翁舊是蓉城主芙蓉城裏芙蓉園葉葉枝枝盡解言爭道芙蓉似儂面儂與芙蓉恰並肩花裏紅橋十三曲曲曲都經履綦熟戲折荷盤弄水珠親裁蓮葉爲羅縠橋亭飛跨水當中一

朵紅雲銷一重花時只愛亭中宿人隔花看似月宮花有交枝
並頭好花下鴛鴦亦相抱至今百寶繡奩中花鳥還畱舊時橐
別有孤亭雲半間撥雪遙見海中山每逢初日三神影落想人
天去住難自從小劫紅羊歷翁亦蓬萊被遷謫太傅池臺久屬
人東山絲竹都岑寂時從夢裏認前緣花謝花開二十年手種
芙蓉在天半起來妝淚溼闌干君今欲采芙蓉去記取儂言認
花路一片澄波曉鏡寒是儂瘦影低徊處池中宛轉多文魚洗
硯來吞墨似珠煩君提取雙魚返或有當年錦字書聞言頓覺
風生腋此身已作芳園客天上人間總渺茫紅橋綠水眞遊歷
水綠橋紅恣往迴園中魚鳥莫驚猜非關方朔偷遊熟纔得雙
成口授來天風謾謾催歸急回首青天作癡立歸來賸有一襟
雪猶帶芙蓉露痕溼

探菊玉松山房花事零落籬落四五枝都無佳者

曲逕疏籬傍水隈扁舟特地看花來老翁搖手向余道好種今年盡不開

平頭奴子閒收拾便有遊人浪品題卻笑頻年總拋擲有誰看到壞牆西

項聖謨梅花卷子

我騎五色蝶去訪羅浮仙蒼蒼太古雪橫斷無青天誰將蓮峯四百三十二一筆揮埽置眼前上邪雲邪何微茫而不可分下邪烟邪何凍合而氤氲春風何來空山自香明月在樹不知昏黃聽翠羽之啁啾悵無言而誰省望美人兮不來抱衣裳而雲冷一枝折得春最先春心欲寄誰爲傳玉笛橫飄一萬里此聲不到丹青裏卷還疏影月當天清夢自落梅花邊

贈蘇甘漁

二十隱于畫一隱五十年身從畫中活不使畫外錢古人工三
體技足千秋傳翁乃兼衆妙空絕後與前或時爲米顛或時爲
黃荃或時爲道子或時爲龍眠腕有九霄露胸有萬里船畫山
山欲活尺几橫黔滇畫花花欲笑寒月春鮮妍尤工寫形貌美
人及神仙能令怒者喜能令愚者憐獨惜里巷名世無知者焉
少時讀離騷放舟瀟湘邊吟詩帶楚聲畫亦如詩然至今宣豪
上猶帶瀟湘烟隱居龐家巷自比龐公賢一夫與一婦日月相
周旋翁自拂箋素婦爲調丹鉛畫成挂壁上風雨防秋寒寂寞
身後名相笑看青天

省墓行爲陸固亭明經

壁堅賦

吾友陸固亭六十尙孺慕思親不見親淒淒向邱墓出郭見松

楸青山埋骨處上爲桃花原下有雙瀑布瀑布是兒淚桃花是
兒血春風尋空來白楊與嗚咽手擷淵底芹就溪濯寒冽照見
清溪中頭髮白如雪載拜墓門自愧鼎牲缺豈無鼎與牲恐
親惡不潔鬱鬱松楸香蕭蕭荆棘荒荆棘刺兒手荆棘刺兒腸
一日拔之盡十日又復長日日一省視敢惜十指傷猶恨風雨
時不得廬墓旁作圖貽後人非以示我孝非願我身後子孫知
所效所恐祖壠荒年遠人希到

城東華氏有姊弟終身不嫁娶以養其親者事雖不軌
于正而志可憫也

生女如巢燕能飛向別枝雲鬢拌一截星漢遂無期永謝香纓
繫長教玉鏡離千秋奇女子又一北宮兒
一笑紅顏對都忘白髮恩誰能無伉儷獨自念晨昏似續何心

計中庸不可論從來奇行士原不在兒孫

重遊陽羨呈昉巖師

小艇烟波載酒行
畫溪鷗鷺早相迎
四圍山色看無恙
一路官聲聽更清
桐邑喜留賢令尹
竹林重歎舊門生
柳條催上長安去
青眼誰如阮步兵

留別陽羨署中諸君子

同是江邊印雪鴻
連宵清話蠟燈紅
詩情易被梅花覺
酒瑣頻傾竹葉空
後會未知消幾日
前生應已識諸公
臨行且復斯須坐
猶勝相思夢寐中

吳竹橋丈得養石山農墨梅長卷構梅花一卷樓屬題

卷後

梅花屋裏梅花人
借梅花形自寫真
平奇濃淡無不可
除卻梅

花惟有我清高是梅意拂衣歸隱門深閉奇古是梅情長屐高
帽伶仃行倔彊是梅骨叱咤能使大將屈縱橫是梅才軍門畫
策天顏開興到淋漓墨一斗掃去渾忘筆在手胸中自有萬梅
花此意後人識得否忽疏忽密忽斷連忽整忽斜忽倒眠一枝
橫穿入明月萬枝亂插當青天看如隨意作點綴筆所未到神
獨全乾坤清氣在此手羅浮擎出秋豪顛畫成風吹滿屋香拍
手自叫梅花王門外兵戈震天際梅花別是人間世北風刺刺
吹倒人一朵何曾吹落地思肖蘭淵明菊著此其閒應鼎足歷
五百年遇老竹爲花造樓與花宿此樓又一梅花屋

屠維協洽

探梅

絳闕琳宮迤邐開玉爐香霧繞星臺萬人如海紅塵裏只爲梅

花一樹來

人日卽事

時將計偕

曉烟不散霧冥冥
花氣惺忪鳥夢醒
起早可知親力健
承歡難得婦心靈
將酬詩債先排日
自揀行期豫看星
人近別離家愈好
當門如畫一山青

公車至京口抱病引還清明日扶杖彊起有作

清明風日果清明
病起親朋慶再生
二月春如長夜過
三旬人似老年行
飛騰北去雲無路
放轉西方佛有情
天亦怕儂詩倔彊
未容頑劣赴瑤京

開窗乍喜見天光
半刻支筇半倚牀
風動瓶花如欲語
潮催爐藥漸生香
友知病起來偏少
人覺閒多日更長
新受孟光吟苦戒
詩成默不與商量

六集卷十一
十六
繡毬花

天工細鏤雪紛紛色混梨花影自分樹頂忽懸無數月風前難
埽萬團雲輕圓好入鍼神譜拋落應隨蕩子羣自負瓊姿巧攢
簇可憐玉貌欠清芬

題半繭園小有堂壁

小園我舊遊涉足得新趣芳逕夾曲紆亭臺錯回互怪石迎面
立前行愕無路俯入身僅容漸起頂忽露數折始到巔巧與來
逕遇孤峯隱西堂欄楯蔭嘉樹空明全趣領幽邃衆妙赴搜奇
賞獲初撫景悟逢故垣楹昔摧隤有美荆棘據何時稍脩葺頓
令遊目誤始知水石佳終藉金碧助美人儉妝梳空谷誰能顧

春陰

斷雲纔漏幾絲明又聽蕭蕭灑葉聲卻笑天公心太活竟無一

刻是真晴

晚晴門巷掩輕蘿小立閒庭看鳥過
貪受飛花滿身上不知殘雨溼衣多

晚晴

天半翠霞起人貪仰面看夕陽鴉背溼
古樹鵲聲乾衣拂泥輕落窗開硯重安
明朝晴未定且得一宵歡

蘇嶼雲夫人墨梅竹卷

邵閭谷太守齊然配

吾鄉女士多如雲嶼雲老人居其首詩名已與若蘭齊
畫筆還爭仲姬右宣城紙白五尺長開卷拂拂清風香橫斜
春影只數點參以瘦石兼疏簾不知起訖在何許畫外有畫殊
蒼茫偶然神到得天趣心與手筆原兩忘俗工紛紛貴形似千枝
萬葉徒披猖老人昔從官杭州年年西溪櫂扁舟綠雲參天雪如海妙

景自在胸中流歸來世事烟雲改夢裏西溪宛然在閒窗點筆
示兒孫要知畫意文章存不經意處自超絕刻意求工反成拙

遊仙雜詩

敕下瑤臺掃落英仙王羽帳綴珠璣扶桑一樹紅霞滿照見滄
溟徹底清

五嶽真圖百寶裝阿環手捧入瑤房丹符玉篆都收起親繡明
霞五色囊

手版橫腰事學仙騰騰劫運遇雷鞭黃金滿竈燒丹日只道蓬
萊在腳邊

茅君小弟餌丹砂偷醉蕃釐道士家孤負采鸞閒盼望玉窗開
殺碧桃花

九鼎靈丹奪上清凡驅輕易學長生張陵要躲神仙劫隱隱雷

聲便喫驚

素書一卷太縱橫不著何人撰姓名玉女傳抄龍鳳篆比他真
誥轉分明

昨夜羣真解佩遊就中萼綠最風流無端失卻金條脫卻被湘
妃笑不休

玉籀曾除又萬年紫宮難得一階遷葛洪自是塵緣少傾盡丹
爐便上天

折得桃花入手春已看丹籀注劉晨一言懊惱仙真意追去靈
符作世人

芍藥精誠事厭禳靈飛六甲扣瓊章上元遞與真消息誤授西
池郭密香

蘭香厭奉玉宸班偷駕雲輶出九關手把芙蓉下人世不逢張

碩竟空還

鑒洲豪客華陽巾服食松脂便絕塵借館潯臺南嶽下每誇親
拜魏夫人

穩坐壺中安樂窩螺紋指掌縮山河仙官誰似長房巧博得虛
皇聳聽多

姑射慊慊瘦雪肌趙雲手進肉靈芝神仙不是凡閒疾浪覓吳
宮獺髓醫

誰開鐵鎖放支祁特敕雷公斬雨師燒得金犀燭幽怪靈鼇曳
尾似潛龜

幽居

十日雨聲裏幽居添夏涼潮生平地海微起滿衣霜老樹無蟬
語空庭只草長高鄉多插蒔最苦是低鄉

過鷗波仙館

何處堪消暑人家秋水邊鄉鄰是漁父夫婦儼神仙拾翠風情
豔烹魚雪浪鮮較贏張玉海權就岸牽船

一笑風簾卷當窗護水雲棋聲鷗鳥識詩骨藕花熏小隱如張
碩同心是左芬綠波雙照影添我畫斜曛

結交行

不見或相思習見易生厭任爾同心人一歲何堪三四見一見
羅酒漿磨刀霍霍屠豬羊傾情倒意無所藏再見猶歡然傳呼
中廚擊小鮮殷勤相送江干船三見意氣改中堂對坐日移晷
客將辭去主先待四見主賓各他顧童僕來窺色微忤監門直
前報機務催促主人出門去烏序主不言客自憐物無貴賤貴
在罕不則鳳凰如雞麀似犬

慰友人悼亡

盒子分攜一扇鈿博山溫煖裊雙烟憑誰祝取星星火見出他
生金薔蓮

華漚

烟水渺無際蓮花何處香一山流不去雙塔影爭長鷗鷺先秋
瘦菰蒲作雨涼舉頭霞四面船恰在中央

胥燕亭將買田陽羨嘉興吳履爲作楚頌圖

昔乘輕舟入畫溪銅官山色落我衣東西雙夾明鏡鏡裏蒼
蒼橫翠微紅蓮稻熟紫蟹肥我思結茅惟此宜東坡先生不可
作後來此樂知者稀君今三十罷官早買田便思瀟湖老農具
親脩汜勝書魚經別屬天隨橐吳興吳生最擅場信手爲埽秋
林霜烟雲叢叢繞嘉樹紙上白華生楚香君家遠在光復北一

種風情屬南國陽羨溪山勝洞庭
茆草牽蘿計偏得霜林九月
奴下頭右軍古帖秋香浮小園
儻許結鄰去我亦山中萬戶侯

己未中秋前四日過東園看桂時老樹十二株花遍庭

宇歸梅坡觀察

朝煦

畱同諸老宴賞因憶乾隆乙巳

邵元直敦夫昆季召集十九人飲酒賦詩于此今兩
君已亡與者或客或死惟余與邵松阿蘇園公吳竹
橋酒次話舊因歎觀察之能得此樂爲難而吾曹之
分其樂者亦不易感今慨昔情見乎詞

黃金鑄成十二仙月中飛下秋香妍園纔五晦蔭六晦但見黃
雪無青天十里九里聞花開主不速客客自來濃香醉人不能
去索須酌我葡萄醅紅螺璣翠羽轉風前起舞顛如雷不知頭
上秋霜催酒酣往事忽思起十五年前醉於此酣嬉淋漓笑不

止搖落繁花滿杯裏雨散星離一霎耳或則飄零或且死當時
牆角初生枝今日連蜷若臂指惟此四客猶徘徊花時更得醉
幾回小山幽樂不易得世人多羨黃金臺花聞我言宛微笑四
客之中君最少不向常娥乞一枝卻隨諸老舒清嘯人生貴適
意焉能委曲求高第但須更醉三萬六千場持杯折花雙手忙
看得此花枝枝長入月中去上接鴻濛萬古香

七夕用東坡贈雲龍山人韻

世人擅風情偏愛今夕好陰陽喜會合諧語通至道綠浮西域
瓜紅熟東鄰棗秋風尋空來青林尙蟬噪梧影落階除涼雲不
可埽佳節入奇懷清歡勿草草及此新秋光玉壺願傾倒天地
有改移華顏豈長保焉用銀漢波潔身以爲澡一簞與一瓢相
娛足終老雙星萬萬年不聞作翁媼願分駐顏術清齋祀閨華

招呼雲中仙高歌抒素抱不恨我生遲所恨仙去早星輝流畫
簷可當月皓皓鑒我新詩成應投玉梭勞

寫梅

玉立亭亭絕點瑕自將清露洗鉛華詩人落筆無凡想只寫東
風第一花

扇頭鱸魚

偶貪香餌上輕絲挂住秋風柳一枝回首烟波無限好橫雲山
下暮潮時

飲山家竟醉題壁畱贈主人

但有香耳全無花主人出門兒守家開缸勸客客竟醉笑看秋
山亦如睡劉伶阮籍同此風惜不相對顏酡紅菱歌歸唱白雲
晚山月應催主人返

結草庵

秋色妙于遠撥茅尋小庵蟬凝深樹碧雲弄晚天藍花雨通禪
悟松風入笑談香清畱客永斜日上孤嵐

滅燭坐月同子侶

纔卷一簾水不知花滿衣卻看孤影動疑有片雲飛螢火幽人
致蟲絲靜者機彊呼籠燭去畱夢繞牕扉

雨霽

雨撥西風轉天容寸碧開出花孤蜨重抱樹一蟬哀爽氣遙山
下愁心遠渚來晝簷雲縷縷秋葉是誰裁

月夜登小三台

我踞長松頂風吹片月來寒光連太白秀氣隱中能落葉詩千
點孤城夢一堆清宵鳴畫角能使壯心衰

宿西巖

秋水滿青天，天心一月懸。
太清爲世界，不睡卽神仙。
列宿兩三點，前身億萬年。
清風莫吹我，我意已飄然。

訪菊

何處香吹秋滿城，西風如爲故人迎。
相思便動披衣興，逕造宜通看竹情。
葛屨踏來霜有蹟，柴門尋遍月無聲。
始知隱逸終難遇，不比桃花滿路生。

秋泛

莫上高峯去，秋聲不可聽。
水將紅葉盡，人與白鷗醒。
返照爭明滅，迴舟入杳冥。
桃花春漲裏，山比此時青。

題畫蘭

高者俯而援，下者仰而企。
地位雖懸殊，已盡交接意。

一叢踞高石微有荆棘礙一叢隱下坡脩然白雲外
誰貽蘭一叢束縛苦不緩何似在山中春風自蕭散
玉芝短于蘭未足與蘭抗祇爲託根高反出蘭之上
葉葉反正殊花花向背各盡手解相思同心定參錯
花是石美人石是花弟子傲骨縱嶙峋伏地拜不起
花葉互相憐石勢亦迴抱萬物皆有情雙手寫不了
翦斷碧玉枝眞香獨盈把遍想紅塵中無人可贈者

鄰家小園

每一花香發扣門求借看盤雲成小逕隱石出飛湍松竹歸家
見禽魚習客安未愁山月起風雨恣盤桓
獨據全園勝吾尤愛此臺一山飛綠下萬樹擁秋來憶昨蟾蜍
夜曾銜鸚鵡杯何當深雪後還看我家梅

乘查

茫茫混太清渺渺碧無情
客子秋邊嘯蛟龍水底驚
片雲何處宿明月此時生
笑指青天上星辰不礙行

小春望日載酒三橋鄰舫有雙鬟度曲呼以侑觴

十里秋聲冷畫橋春情偏在木蘭橈
豔緣豈必三生定愁思如何一醉消
茗盃盡浮雲影活衣香疑帶水沈燒
對來二月花光好只少風前翠幾條

一聲長笛葉紛紛萬點桃花兩鬢雲
逼近坐如天上遠極清歌凌水邊
聞雨香飛溼紅螺琰詩思飄然白鷺羣
人物湖山總千古畫圖何待李將軍

蔣生季平自京師扶櫬南還行卽赴浙詩以送之

昔與尊公交汝年方十四殷勤學侯芭
停車來問字間爲古詩

歌無理有奇致同學錢叔與張伯溫跌宕共遊戲尊公病京師
春往入侍明年我計偕相見在旅次五月卽歸來汝信月屢至
言親病日羸言親病且治知我思念深覩縷慰遠意前歲秋風
中音書忽不繼張生與我函謂汝守親制驚悼失良朋兼憂汝
顛顛一棺滯春明今始遂歸計喜汝身漸長哀汝孤無寄幸汝
學可增憂汝家爲累過汝昔所居詩酒舊遊地苑枯如一夢六
七年間事雖無山陽笛忍制黃壚淚汝今奉慈闈往依叔父庇
汝叔爲清宦友愛敦古誼汝往能羽翼與親實無二武林去故
鄉月可書數四匪索寄我書須念親未瘞勉旃誦清芬臨歧各
掩涕

王蘭泉司寇通得先人墓田靈芝一本繪圖索詩爲作

紫芝曲三解

人中瑞王司寇物中瑞靈芝秀秀不於庭而於墓門天將使頌
公者兼頌公之先人解一公之功在凌烟公之德在白雲天惟功
與德應此祥世人但頌公文章解二公曰匪予功公曰匪予德惟
予先人有世澤不見墓前紫芝大於石解三

寒夜

涼風萬里至清怨滿空城一夜南樓雁兼之落葉聲燭花如欲
語秋夢苦分明不是離居者還應共此情

天真閣集卷十三終